



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Assam Chief Secretary Baruah-i Udalguri semdang

KKR nungi asayar Pat Cummins IPL nung masayatsü



VOL. XVIII NO. 227 (ADOK 227) DIMAPUR

SANGTENNÜ (TUESDAY)

AAMI (JUNE) 01, 2021

₹ 5.00

COVID-19 Nagaland: Puteter dang nungibo taneptsü angur timba

Kohima, May 31, 2021 (TYO): Nagaland nung anogo 47 buba nung tanü mezüing atema COVID-19 puteter dang nungibo taneptsü angur timba liasü.

Tanü COVID-19 puteta alir nisung 215 taneptsü angur aser nisung 117 dak putet. Parnok züngsema COVID-19 puteter ajak agi 21,680 kümogo.

"Tanü nisung 117 dak COVID-19 putet. Parnokji Kohima nung 47, Dimapur nung 33, Mokokchung nung 9, Wokha o Zunheboto nung tenetnet (7), Mon nung 6, Kiphire nung 5 aser Longleng, Phek o Tuensang nung kaka (1) lir" ta Health & Family Welfare, Minister S Pangnyu Phom-i metetdaksü.

"Maneni, tanü COVID-19 puteta alir nisung 215 taneptsü angur. Parnokji Dimapur nung 128, Kohima nung 36, Zunheboto nung 12, Longleng o Phek nung terkaka (11), Mon nung 9, Kiphire o Mokokchung nung asemsem (3) aser Peren nung 2 lir," ta Minister Pangnyu-isa ashi.

Nisung 21,680 rongnungi 15,738 taneptsü nguogo aser 4,934 anepaludar, ta paisa ashi.

Nagaland nung COVID-19 nungi taneptsü angur 72.59% lir.

"Tang anepalurtem rongnung nisung 235 dak shirangba yimya terara lir, 88 tera shiranga oxygen agir, 58 kanga shiranga oxygen agir, 29 ventilator medeni ICU nung aser 8 ventilator nung lir. Nisung 4,516 dakbo shirangba

yimya kecha mali" ta Integrated Disease Surveillance Project atema State Nodal Officer, Dr Nyanthung Kikon-i metetdaksü.

Hombarnü COVID-19 puteta alir nisung 13 asü. Parnokji Dimapur nung 9, Kohima nung 3 aser Longleng nung 1 lir. Tasür ajak agi nisung 376 liasü saka parnok 13 bo tanga tashidak ajanga asü, ta paisa ashi.

Nagaland nung COVID-19 puteter nisung 632 tashi tanga state temi ogo, ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 1,92,253 tendangogo. RT-PCR ajanga 89,481, TrueNat ajanga 55,541 aser Rapid Antigen Test ajanga 47,231 tendang.

CHOZUBA NUNG GHONDA 72 TOTAL LOCKDOWN ASÜTSÜ:

Phek district kübok Chozuba jila nung COVID-19 kanga putetba azüoktsü atema ghonda 72 total lockdown asütsü tetuyuba agütsüogo.

June 1 nungi 4, 2021 tashi total lockdown asütsü atema Chozuba Additional Deputy Commissioner Theodore Yanthan-i tanü tetuyuba agütsü.

"Chozuba nung public health & safety aser Covid-19 menatepba azüoktsü atema iba tetuyuba agütsür. COVID-19 menatepba raksaktsütsü atema iba mapang contact tracing alitsü" ta paisa metetdaksü.

MTBA-i CCC Marepkong nung community kitchen achaayangtsü

Dimapur, May 31, 2021 (TYO): Mokokchung Town Baptist Arogo (MTBA)-i Covid Care Centre Marepkong nung community kitchen achaayangtsü.

Corona putetertem home isolation südaktsüba ngua arogoi community kitchen lapoktsü telemetba agi, ta MTBA Pastor Rev. Ponen Longchar-i ashi.

"COVID-19 aliba putetertem pei kidang dang mongdaksüba ajanga virus menatepa aotsü akok kechiyong kibong aika nung metsümeshidak ka dang amshir aser ano tetsükdaksü aika ajurur. Anungji MTBA-i district administration dang Covid Care Centre nung lapokshitsü aser arogoi joka ketdangtsütsü atema asüngdang" ta paisa ashi.

Arogoi joka anepaluba dak alia centre nung amongertem den anepdang aser nikongdang tekülem mapang ketdangtsü agütsü. Ano, phone ajanga counseling aser sarasadem agütsütsü, ta Rev. Ponen-isa ashi.

MTBA youth department züngsemtemi joka achayanga reprangtsü. Asüng nungi Covid Care Centre Marepkong lapoktsü atema mapa inyakdar aser MTBA nung pastor temi anir arogopurtemi centre nung amongtsü atema arur nem agütsütsü atema welcome kit ka renemer.

Yaküm COVID-19 wara mezüingbuba agi kongshidang Marepkong Mokokchung nung Covid Care Centre ya lapoka liasü.

Dimapur nung COVID-19 putetba ajema akümer

Dimapur, May 31, 2021 (TYO): Dimapur nung COVID-19 menatepba ajema akümer aser lockdown ajanga tajangzük lir, ta Dimapur district atema Nodal officer, Y. Kikheto IAS-i ashi.

Dimapur nung public-i mozü kitem osang tejangjaba nung metettsü atema <http://teamdimapurcovid.com> ta ser website ka lapoktsüogo ta pai tanü metetdaksü.

Taoba hopta ishika Dimapur district nung Covid positive 61% liasü saka tang 50% dang kümogo, ta paisa metetdaksü.

Dimapur nung tang nisung 2509 anepaludar aser parnok rongnungi nisung 2231 home isolation nung lir. Mozü ki balala nung nisung 162 anioka anepaludar, ta Kikheto-isa ashi.

January 2021 nungi tanü tashi nung Dimapur nung sample 30,027 tendangogo aser iba nungi nisung 5179 dak COVID-19 putet. Tang total lockdown tembang tashi nung COVID-19 putetba ajema akümsü imlar, ta paisa ashi.

Dimapur nung sorkar aser nija mozü kitem nung Covid yipden 375 lir. Hopta asemtsüingda Team Dimapur-i yipden 285 renemet. Private hospitals aser Private Doctors Association-i iba wara anema rara nung shilemtulu agiba atema tenügang agütsür.

Team Dimapur-isa New Purana bazaar nung lapoka aliba Institute of Hotel Management

(IHM) nung Covid yipden 110 renemogo. Iba ya reserve nung yua lir aser kodang lapokdir tanga district tem nungi healthcare workers anir arua ketdangtsütsü. Iba atema Brigadier Assam Rifles den healthcare workers kar yariteptsü atema jembitepdar, ta Kikheto-isa ashi.

"May 25, 2021 nungi District Hospital Dimapur nung PSA Oxygen Plant lapokogo. Hopta ana tsüingda state sorkari oxygen cylinders nungdakba ama peria anepaluogo aser tang Nagaland nung oxygen cylinders peria dang lir," ta paisa metetdaksü.

Dimapur nung Covid putetertem aika asür. January 2021 nungi tang tanü tashi nung nisung 214 asüba nungi parnok 11 dang vaccine indang dose mezüingbuba agir liasü aser nisung 203 bo vaccine magi. Nisung 214 rongnung tebur 148 aser tetsür 66 liasü, ta paisa ashi.

"Social media nung nisung kari vaccine indang osang tiyazü prokshir anungji parnok dang kümdangtsü ashir. Nenoki vaccine maginüba agi tangar meratadaksütsü. Deputy Commissioner aser Commissioner of Police-i item osang prokshir azüoktsü" ta Kikheto Sema-isa ashi.

"Iba wara anema rara nung civil societies, arogotem, NGOs, kibongtem aser kijatemi peii akokba agi yaritepba atema tenügang agütsü. Nenok teyari

ajanga onok khuret pungpadaktsüogo aser maneni tarutsü anogotem nunga yariteptsü mepishir" ta paisa metetdaksü.

'Frontline Workers' aser talisa Health Care Workers-i bendanga agüja inyakba atema tenügang agütsür. Mapa tasak saka asenoki iba rara nung takok angutsü. Dimapur district nung alirtemi tsüba meblemetsüla saka Tsüingrem dang temolung alemtsüla, inyakyim sülen anidaksüla aser taküm kümzüka ayutsü atema vaccine agütsü ayongzükür" ta Kikheto-isa ashi.

Paisa media nisungtem dang mapang shitak nung osang sangoktsüba atema pelaba metetdaksü.

Senden nung Dimapur Deputy Commissioner, Rajesh Soundararajan-i o jembidang state sorkari tensa asadanger Dimapur nem senotsü dang masü saka medical resources aser tanga nungdaktem alakteta agütsür ta ashi.

"Lockdown mapang Dimapur nung ozüing alema mapa inyakba kanga ajema akümbaji osang tajung lir. Iba ya public senzusenbong masüba aser maparen meinyakba ajanga lir" ta Commissioner Police Dimapur Rothihu Tetseo IPS-ia ashi.

Külen, CMO Dimapur-ia nisungtem dang shirangba yimya aliba ajitetra tekaratiba nung medical teyari bushitsü ayongzük.

Supreme Court-i Covid-19 vaccine inyakyim atema ashishiteper

New Delhi, May 31, 2021 (Agencies): Hombarnü Supreme Court-i Centre dang vaccine agütsüba inyakyim nung metokmeperi aika lir ta tuteta shiogo.

"Centre-i vaccine agütsüpurtemi CoWin registration asütsüla ta ashir saka iba ya koma inyaka aotsü tebilemba lir?" ta Justice D Y Chandrachud, Justice L N Rao aser Justice S Ravindrabhat nung adenba special bench-i asüngdang.

"Nenoki tensa den apet mapa inyaker ta ashir saka sentong yanglurtemi jungjunga shisadangtsüla. Nenoki digital India indang jembir saka yimtsüingtem nungbo khenyongi balaka lir. Kodaser Jharkhand nungi azüngtsü-zülutsü memetetba aayanger kati Rajasthan nung register sütettsü? Nenoki iba digital tebandang ya koma inyaksü" ta parnoki Solicitor General Tushar Mehta dang asüngdang.

"Nenoki tensa jungjunga metettsüla aser iba denji putepa policy melenshütsüla. Onoki iba policy yanglur süra, anogo 15-20 tejkdang yanglur lila" ta special bench-isa metetdaksü.

"Nisung ka dose tanaben agütsü bushiteptsü atema registration asütsü nungdaker. Yimtsüingtem nung nisungtemi community centre nung register asütsü akok," ta Mehta-i langzü.

Idangji special bench-i Mehta dang sorkari iba mapaji inyaka otettsü ta bilemer asü ta asüngdang aser parnok nem policy document agütsütsü ashi.

2021 küm tatemlen tashi nung Centre-i nisung ajak nem vaccine agütsünür saka iba nung tetsükdaksütem aser vaccine supply nung tim masüba inyakyim lir ta bench-isa metetdaksü.

"Arishi küm 45 ser temapur atema Centre-i vaccine alir saka arishi küm 18-44 atemabo lemsa lir. Parnok atema vaccine tesadang

ka Centre-i jenjang lateter alizükür aser tanüingbaji nija mozü kitem nung agütsür. Iba ya kechi koma inyaker?" ta parnokisa asüngdang.

Punjab aser Delhi state sorkartemi foreign vaccines alizüktsü atema global tenders agütsütsü asoshi mapa inyaker. Külen, Brihanmumbai Municipal Corporation amala Municipal Corporation temi bids nguogo, ta Supreme Court-i Centre dang vaccine procurement policy atema asüngdang.

"State mesüra municipal corporation kati vaccine alizüktsüba ya Centre sorkar indang policy asü? Onoki iba policy jangjangja metetnür" ta parnokisa metetdaksü.

"Kechiba state sorkartemi Centre dang nungi sen talila agüja vaccine alizükür" ta Supreme Court bench-isa asüngdang aser hopta ana tsüingda Centre-i telangzüba agütsütsü mapang latettsü.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



Mokokchung nung World No Tobacco Day 2021 nungogo



Dimapur, Monupii/May 31 (TYO): Tanü IMDH, Mokokchung nung District Tobacco Control Cell Mokokchung ajanga World No Tobacco Day 2021 anogomung munga liasü, ta Chief Medical Officer, Mokokchung ajanga sangdong ka nung ashi.

Iba sentong nung Dr. Taliwati, District Nodal Officer, National Tobacco Control Programme (NCPT), Mokokchung ajanga mozüki nung inyaker den iba

anogomung teratet indang tongmelang agi lemsatepa liasü.

Moko achiba aser talisa tashidak wara agi alima tesem ajunga sünger aliba mapang moko achiba janga timtem agütsüba, metzü metsüba nungi COVID-19 tashidak prokshia aoba indang pai rateta ashi.

Taküm World No Tobacco Day 2021 omen ya "Commit To Quit" liasü, aser iba omen nung ajemdaker school azüngertrtem online nung essay zülutepba

sentong ka agia liasü.

Iba tetoktepba nung mezüngbuba jenjang ya Queen Mary Higher Secondary School nung Class 12 azünger, Akumienla-i nguteta liasü. Tanabuba jenjang ya Assam Rifles High School nung Class 9 nung azünger Moluren Longkhum-i ngutet aser tasembuba jenjang ya Edith Higher Secondary School nungi Class 10 nung azünger Sunepbenla T Imchen-i nguteta liasü.

Lokti tentet balalai Dr. P.S. Lorin asükhu lemsatep

Dimapur, Monupii/May 31 (TYO): Tetso College, Sovima indang Founder aser Principal Emeritus, Dr. P. S. Lorin ajungbena May 31, 2021 nü asüba osang angazüka Department of Higher Education ajanga mangyim jashi lemsateper, ta Dr. Apeni Lotha, Director, Higher Education, Nagaland ajanga sangdong ka nung ashi.

Asür Dr. P. S. Lorin ya state nung Higher Educational Institutions atema temelenshi bener arutsüba lenir ka liasü. Pa asüba ajanga state nung shisaliok tsütsü tejangja lenir ka samaogo. Ajisüaka shisa agütsür tejangja ka ama pai shilem tulu agiba teti alitsü, ta sangdong ajanga ashi. Ajemalu aser nisung dak aochiba molungsentsü alisang asür tanüla nem Department ajanga akum agütsür. Department ajanga mangyimer kibong, Tetso College nung tesayur aser kaketshirtem den asükhu lemsateper aser Tulusang Tsüngremi tesunep agüjang ta sarasademtsür, ta sangdong ajanga ashi.

Naga Hoho tir H.K. Zhimomi-ia sangdong ka nung, Tetso College tenzüksang aser Principal Emeritus, Dr. P.S. Lorin ajungbena Dimapur nung May 31, 2021 nü asüba osang angashia aoksar aser sasar, ta ashi.

Asür Dr. Lorin ya shisaliok nung takoket aser ajemaluba takum ka liasü, shibai Naga nübur atema bendanga agütsür inyaker. Shisa agütsür aser tembar ka ama Naga lokti lungjemtsü atema pai bendanga agütsür shilem agiba teti bilemtettsü. Pa asüba ajanga tawa adokba melentsü makoktsü, ta Naga Hoho ajanga ashi.

Tang mangyim tejashi mapang Naga Hoho ajanga asüri yutsür aoba kinungertem den asükhu lemsateper aser asür tanüla teti tatem maka tesunep nung anisüngzükjang ta sarasademtsür, ta sangdong ajanga ashi.

ANPSA-ia sangdong ka nung, anojungi Dr. P.S. Lorin asüba osang angashia mangyim tejashi lemsatepa liasü.

Asür Dr. Lorin ya jangrabangra aliba social activist ka liasü aser pa ya Naga People's Movement for Human Rights aser Forum of Naga Reconciliation tenteter rongnung züngsem ka liasü, aser pa lanuwa mapang Naga Students' Union Delhi indang tir inyaka liasü, ta ANPSA tir Dr. Andrew Ahoto Sema-i sangdong nung shia liasü.

Pa asenok nungi pilaka pai inyaka yutsüba mapa tem asenoki teti züngshitsü aser asen molung ajungmesotsü. Mangyimer kibong den

temolung taroktiba nungi asükhu lemsateper, ta ANPSA sangdong ajanga ashi.

Founder aser Principal Emeritus, Tetso College, Dr. P.S. Lorin ajungbena May 31, 2021 anepdang asüba osang angazüka temolung shiranger aser mang ayimer, ta All Nagaland College Students' Union (ANCSU) sangdong ka ajanga ashi.

Dr. P.S. Lorin ya shisaliok tsütsü takotet nübu ka liasü aser pai Nagaland nung shisaliok ajungketba nung tongti shilem agia liasü, ta ANCSU sangdong ajanga ashi.

Asen state nung aser alema oa pai shisaliok tsütsü rongsen agi malangzüktettsüba shilem tulu agiba atema ANCSU-i pelar aser akum agütsür.

Pa tewangshiba mapang Nagaland College Principals Association indang tir (2003-2009) ka ama inyaka liasü aser kaketshir jenjang ajungkettsü atema shilem tajung agiogo, ta sangdong ajanga ashi.

Kaketshirtem shisaliok tsütsü alizüng tasen kati ayaoka aiba mapang pa ama shisashir ka maliba ya kanga jangja metettsü.

ANCSU ajanga asür kibong den mangyim tejashi lemsateper aser asür tanüla teti tatem maka tesunep nung anisüngzükjang ta sarasademtsür, ta sangdong ajanga ashi.



FSSA Team (Analytical & Enforcement) den Dr. Neikhrielie Khimiao, Principal Director, Health & Family Welfare nungertemi May 31, 2021 nü Designated Officers, Food Safety Officer & Food Analyst nunger nem Laptop aser Tablet lema agütsüba mapang tangokba noksa ka yangi angur.

M/s NagaEd ajanga kaketshir aser tesayurtem yaritsü

Dimapur, Monupii/May 31 (TYO): COVID-19 tashidak wara mechi school tem shibangba ajanga M/s NagaEd-i kaketshir aser tesayurtem yaritsü atema tsünglanglen shia aliba 'educational resources' tem angati agütsütsü shimteta lir, ta Directorate of School Education ajanga sangdong ka nung metetdaksü.

Item teyariji yamai alitsü:

1. Department of School Education, Nagaland ajanga broadcast asüba Chapter shia Video Lesson tem.

2. Class 8, 9 & 10 (NBSE Syllabus) atema TicTac Learn.
3. Download sütettsüba NagaEd ajanga renemba Class 10 Science subject (NBSE Syllabus) notes tem.
4. Tesayurtem atema Professional Development Resources.

Kaketshir, tsürabur aser tesayurtem dang shia aliba resources/service ya website www.nagaed.com/free-resources/ nungi angati agizüka amshitsü ajungshir, ta sangdong ajangasa ashi.

Kohima nung Hardware dokan lapoktsü melar

Dimapur, Monupii/May 31 (TYO): Taoba mapang dokan/business establishment lapoktsü mela aliba den bendenloksema Hardware dokan tem lapoktsü atema Deputy Commissioner & Chairman, District Task Force, Kohima, Gregory Thejawelie

NCS ajanga May 31, 2021 nü metetdaksüogo.

Iba totuyuba nung aibelenba nisung/telok kar danga lira, itemji Indian Penal Code indang Section 188 aser Disaster Management Act 2005 kübok tapet temerenshi agütsütsü, ta sangdong ajanga ashi.

Kohima nung Hardware dokan tem lapoktsü:

SL. NO.	DAY	WARD NO. AND NAME
1.	Bodhbarnü	1- High School, 2- Bayavi, 3- North Block, 4- Naga Bazaar, 5- Kitsubozou, 6- D Block, 7- Daklane, 8- New Market
2.	Hokulbarnü	9- Midland, 10- Hospital Colony, 11- PWD, 12- Upper Chandmari, 13- Lower Chandmari, 14- Dziiviiri, 15-AG, 16- New Ministers' Hill, 17- Agri Forest, 18- Paramedical (Merhulietisa), 19- PR Hill.

Dist 5 atema Mkg oxygen cylinder zonal depot asütsü sangdonger

Mokokchung, May 31 (TYO): Mokokchung, Tuensang, Longleng, Zunheboto aser Noklak district-tem atema Multi Purpose Indoor Stadium Mokokchung tesemji 'zonal depot' for oxygen cylinder asütsü sangdongogo, ta osang tejangja ka ajanga angazüker.

Mokokchung nung zonal depot for oxygen cylinder anepalutsü atema Mokokchung

DC Limawabang Jamir-i luden ka shimtsüogo. Luden nungji; Mokokchung ADC - Shashank Pratap Singh IAS (nodal officer), Mokokchung SDO (C) - Temsuchuba Jamir, Mokokchung Dy. SP (R) - Pholosing Sangtam, Mokokchung DPO - S. Jongtosang Aier aser MMC Inspector - Talimar par pungu shimtsüba osang ajanga

Mkg Covid Care Centre June 1 nungi tenzüksahir

Mokokchung, May 31 (TYO): June 1, 2021 nungi Mokokchung town kübok Marepkong Ward nung Covid Care Centre (CCC) tenzüksahitsü.

Anungji, Covid-19 agi shiranga alir nungdakbapurtemi Mokokchung CCC nung amungtsü atema item mobile

number; (i) Er. Imlisunep (Principal, ITI Mokokchung) - 7005643192 (ii) Dr. Temsuyanger (ZLO) - 9862324202 (iii) Dr. Ajemrenla (DPM) - 7005179769 (iv) Dr. Imsongienla (MO) - 9890962231, nung tongtepratep asütsü asoshi Mokokchung DC, Limawabang Jamir-i sangdong ka ajanga metetdaksü.

Mon nung COVID-19 dak sendakba mapa inyaktüsü jaoker

Dimapur, Monupii/May 31 (TYO): Ministry of Skill Development & Entrepreneurship, Government of India ajanga sangdongba den bendenloksema, Deputy Commissioner, Mon, Thavaseelan K, IAS ajanga May 29, 2021 nü sangdong ka nung Mon District nung alirtem PMKVY 3.0 kübok COVID-19 dak sendakba mapa inyaktüsü atema training agitsü tejangrartertem jaokogo.

Iba mapa indang tejangja yamai alitsü:

1. *Emergency Medical Technician-Basic - Class XII*
2. *General Duty Assistant (GDA)- Class X mesüra Class VIII*

Application den nungdakba document aser bio-data ya Office of the Hope Global Ministry, PMKVY Training Centre, Wagiem Ward, Mon nem June 06, 2021 tashinung agütsütsüla.

Iba dak sendakba nung osang tali tejangjaba nung metettsü atema mobile number 8974638536/7628845834 nung tongteprateptsü akok.

Manipur nungi child activist Licypriya tebu police-i apu



Child activist Licypriya aser tebu Kangujam Kanarjit. (file noksa)

Imphal, May 31, 2021 (Agencies): Manipur nungi child 'activist' Licypriya Kangujam tebu Hombarnü Delhi Police aser Manipur Police-i puogo.

Pa ya Kangujam Kanarjit (Dr KK Singh) lir.

Kanarjit ya Arrla 420 (Fraud), 324 (Assault) aser 406 (Criminal breach of trust) nung ajemdaker apu.

Kanarjit-i nisung aika ashioktsü ta tai tonglokja lir. Pa ya Imphal East district kübok Porompat nung para ki ka nung liasü aser Club 25 banner kübok mapa inyaka aru.

Ajisüaka, pai pa aliba ki kibur nem memetdaksüi kulikaket taila yanglur nisung asem dang kiji ayok ta tai tonglokja lir.

January 4, 2016 nü Porompat police-i Kanarjit apu. Khongman Mangjil nung alir S Krishnadutta Sharma-i FIR benokba sülen pa apu.

Pa apuba sülen pa interim bail nung chiok saka idang nung jagi pa jenshia aru.

Kanarjit-i taila kulikaketem

aser signature amshiba atema tai tonglokja lir. Taoba mapang Manipur Police-i pa aputsü atema osang sangoktsür nem Rs 1 lakh senpet agütsütsü nangzüka lir.

Pai International Youth Committees (IYC) tenüing nung national aser international students nungi sen aser fee meshi, youth meets & tanga seminars ayongzüksü aser menoknok agi kongshirtem yaritsü ta ser sen saru saka mapabo meinyak.

Osang angazükba agi Kanarjit Singh-i tim masüba inyakyim ajanga sen crore aika bendenogo.

Kanarjit'er jala Licypriya-i July 2018 nungi climate change anema inyaka arur.

Climate activist Greta Thunberg-i ajungmesoa Licypriya-i nem metetdaksütsü atema June 21, 2019 nungi hopta ka tashi Indian Parliament House kima nung among.

Licypriya indang Twitter handle ka lir saka iba ya lai mamshir ta shia lir.

April 2019 nü UN headquarters, Geneva nung 'Disaster Risk Reduction' indang 'global UN session' nung la o jembitsü jaok ta Licypriya-i ashi.

Iba osang ya kanga belenshi saka tatem nung iba osangji tiyazü liasü. Imphal Free Press-i bushitepa aodang Licypriya UN-i jaokba kuli kecha mangu aser tebuji ashikülaker ka ta bushitet.

Kanarjit Kangujam-i taoba mapang nung menoknok agi takoksa ajururtem atema organizing committees aser relief tenüing amer sen saru saka ibaji tatongtsüpur matong ta tai tonglokja lir.

May 29, 2021 nü Licypriya-i "Taonung onoki Tamil Nadu nung dangi 100 B-type Oxygen Cylinders yoker. Onoki Manipur dangi 100 oxygen cylinder yokogo" ta metetdaksü liasü.

Licypriya Team-isa India nung nisung takümtem kümzüksü atema nüboritem dang nungi tenla meshir.

Tripura nungi tesemanati 'Queen' jiru yokogo

Agartala, May 31, 2021 (Agencies): Mozü mamshi tsünütetba 'Queen' jiru seret 700 shi Tripura nungi Delhi aser Telangana-i yokogo.

Covid-19 tensa ajanga Tripura nung aluyimertem sen arutsü lenmang nung timtem madokdaksütsü nükjidong yur Organic Mission mapatong kübok mapang shia State nungi 'Queen' jiru ya tangaleni yoker.

Neermahal Organic Farmers Producers Company indang jiritem tangaleni yoktsü atema Bangalore nung amenoka aliba Internal Competency Center for Organic Agriculture (ICCOA) den Tripura sorkari tenangzüktep agia lir.

Mohanbhog Agriculture Sub-Division indang agriculture officer, Dr Vibhas Kanti Dey aser ICCOA officer Bishwanath Chakraborty nati 'Queen' jiru yoktsü asoshi maparen tenzükogo.

Indigo Airlines teyari agia company ana - Hyderabad, Telangana nung AR4 Agro International aser Delhi nung KCS Quality Inspection Private Limited, Delhi yagi Tripura nung adokba jiritem alizüka belener.

Tang ama Covid-19 tensa tamajungdang, aluyimertem pei kidang nungi dang ayong ayonga jenjang tajung nung item jiru yokttdaki.

Tayimtsü ajanga state nungi item jiru belener. Taoba budget session nung centre sorkari ajanga Kisan Udan tenzükja lir. State nung aluyimertem iba service indang tajangzük angutsü.

Taküm Organic Mission kübok iba state nung jiru jenti adokogo.

Mozü mamshi tsünütetba jiritem ya tanga jiru dang nungi tera tasakba lir aser shishilembadak nüburtemi iba jiru kanga sapua aliteper.

Assam Chief Secretary Baruah-i Udalguri semdang



Assam Chief Secretary Jishnu Baruah-i Udalguri district nung tzümetsung atema mapa inyakbatem reprangba noksa nung angur.

Guwahati, May 31, 2021 (Agencies): Assam Chief Secretary Jishnu Baruah-i Udalguri district nung tzümetsung atema mapa inyakbatem reprangshim aser Covid-19 tensa indang osang metetpelaogo.

Deobarnü, Baruah-i Udalguri district administration nung ketdangsürtem den senden ka amen. Senden nung Udalguri Deputy Commissioner, Dr P Uday Praveen, Udalguri Superintendent of Police - Hiranya Barman, Joint Director of Health Services, Udalguri - Dr Tayebur Rahman aser tanga tongti ketdangsürtem aden.

Senden nung Baruah-i "Mission Mode" nung Vaccination maparen achaayangtsü indang jemb.

Frontline workers, health workers, police personnel, essential service provider aser child care institution indang staff ka danga mezüdoki

vaccine agitsüla, ta paisa ashi. Baruah-i district aser police administration dang lokti adenshiba sentongtem akok tashi nokdangtsü tetuyuba agütsü aser train nung senzüsönbonger densema akok tashi nisungtem dak COVID-19 test agitsü ashi.

Kasa senden nung, Assam Chief Secretary-isa, NFSA aser PMGKY kübok May ita atema jang lema agütsüba indang asündangya aser tajangzük angutsüpur nem mapang shitak nung tagütsütsü tim agütsütsü asoshi pai administration dang tuyu.

Deobarnü Baruah-isa Udalguri District Jail, jail nung COVID care centre aser Udalguri District Hospital semdanga liasü.

COVID-19 tensa asadangshiba dak alaka Assam Chief Secretary Baruah-isa iba District nung tzümetsung atema maparen inyakba reprangshima liasü.

Serchhip nung AR-i Veer Naris nem teyari agütsü

Aizawl, May 31, 2021 (Agencies): HQ Inspector General Assam Rifles (East) tawabangba kübok HQ 23 Sector Assam Rifles-i achaayanga Serchhip Battalion - Assam Rifles-i New Serchhip nung Covid-19 agi kongshir alir Veer Naris nem jangotsü aser tanga nüngdakba osettsüsettem lema agütsüogo.

Tang ama Covid-19 tensa tamajungdang Mizoram nung Serchhip Battalion indang Assam Rifles-i Veer Naris atema meranga inyakdar.

"Iba maparen maneni tejakleni bener aotsü temolungtetba nung, Serchhip Battalion - Assam Rifles-i Veer Naris ana semdang aser Assam Rifles nungi maneni yariba temaitsü sayua, parnok nem teti nüngdakba osettsüset aser jang-o-tsü tem agütsü," ta HQ IGAR (East)-i sangdong ka ajanga metetdaksü.

Serchhip Battalion indang Subedar Major-i New Serchhip nung alir Juliet Zongmawii aser Laldengi na den ajurutepa jemb aser tenaprongla nem jang-o-tsü aser nüngdakba osettsüset tem

lema agütsü.

Iba den külemi Assam Rifles telokisa tena nem immunity booster, mask aser sanitizer tem agütsüogo.

"Linük atema bendanga agüja tasüitta rarar sepai kibongtem yaritsü asoshi Assam Rifles-i teti bendanga agüja inyaksü renema lir," ta sangdong nungsa metetdaksü.

Item jangotsü aser osettsüset agütsüba den külemi Assam Rifles-isa nüngdakba mapang nungita yaritsü asoshi tena dang nangzükogo.



Assam kübok Kokrajhar Police-i rs 1 crore alang ganja seret 572.80 puogo. Srirampur nung police-i garitem mita reprangdang driver indang cabin nung "secret compartment" ka nung ganja bena aliba apu. Iba dak sendakba nung nisung ana puogo. (Kokrajhar, May 31)



TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 01, 2021

Moko sali machitsü nangzükang

Yashia alima ajunga nung 'Moko Machiba Anogo, World No Tobacco Day,' mongogo. Taküm 2021 iba anogomong omenji " Moko sali machitsü nangzükang" , Commit to Quit, ta agüja liasü. Atangji, moko sali achirtemi moko sali ya temang asoshi majunga ta meteta lir saka memetetika yimya sübaa adokba agi, joko meindoktet, tesüsabo sali moko nemjiang pei temang aser taküm chidaktsütsüsa kumadoker. World Health Organisation (WHO) osang ajanga ashiba agi, moko saliba achiba agi alima nung küm shia nisung million 8 (lakh 80) dak tali asür aser item rongnung moko sali achirtem nisung million 7 shi aser moko Sali achirtem den külemi medemer aser kinungertem million 1.2 shi asür. Tetezü alima nung moko sali agi tashidak tapu balala adoka asürtemji moko sali achirtemji dang masü saka moko sali achirtem dak nungi menemokba aser sali metsü nungi menaba ajanga asür parnok kinunger adianutem, tembar medemertem aser külem tesem ka nung mapa inyakertem dena küm nung lakh 12 shi asür. Itemji moko sali achirtemi tepsetba purtem ta ashitsüa akok. Atangji, WHO teloki ashiba amaji, moko sali endoktsü aser machitsü nangzüksübaji, tang Covid-19 agi kanga mejungi asenok ajak amokmerenba mapang yasa tenüngdakba aser tajungba lir. Moko aser sali achiba agi tebang, tebungü, terok aser tepokpok tezü rongsadaktsür aser idak nung jagi tenzüka komo tamajung kuma cancer tashidak adokdaktsür. Aji oda, moko sali achirtem dak yimra manga, tuberculosis (TB), pneumonia aser tango junga mesashitetsüsa temang nung timtem melamelaa atonger. Itemji kodang asenoki bilemdangdir, tang ama Covid-19 wara agi nisungtem timtemdaktsüba ya tamasa yimra agi atongtsü aser iba sülen anogo ishika tsüngda kasa Corona mesen jagi luagi tepokpok achi tenzüksü aser kopi melii nisungji tango mesashiteti kuma asütsü ta atalokba asenoki angur. Aji oda, moko sali achiba agi tepokpok majung kümdaktsür süra moko sali achirtem dak corona mesen jagi tama aser temelaba atongtsü. Ano, Covid-19 tashidak menatepba aoba lenmang kaji, metsü (saliva) mashimashi metsüshiba ya lir, iba jagi Covid tashidak nokdangtsü atema nisung shia pi alidak teni tebang sü agi nembanger senzütsü ozüng kuma ajungshiteper. Aji oda, sali achirtem sali metsü metsüba nungi iba tashidak ya tangar nema melamelaa menaoktsütsü aser sali achirtema sali metsü metsütsü mask agizükli enokli asüdang memetetika Covid-19 mesenji pei teni tebangi iadoktsü ana nung lir. Ibaji dang masü sali achirtemi agiba mask-bo melamelaa menenadoktsü, anungji idak nung jagi fungus tashidak adoktsüa melarmelar asütsü. Moko achirtema yamaji moko achidang mask agizüker temeyong agi tebang mechi nung tangshia moko mesepli agizükli asüdang moko mokozü jagi luagi tepokpok aser tezü nung timtem agütsüba dang masü saka temeyong nung tenük agi manguba mesen, virus, alibajji tebang nungji menaloktsütsü ana nung lir. Item ajakji bilema, tang ama mapang ya moko sali endoktsübaji kanga tenüngdaktsü kümogo. Atangji, küm aika yimya sübaa chia arur moko sali endoktsübaji temela masü, ibayongji moko sali achirtem aikati endoknüaka meindoktetter. Ano, moko aser sali achirtem asoshi süngo jemer mesüra chiyonger külen moko aser sali chinüra atubaji taremtetsüla masü atur, anungji machitsü bilemyonga iba tatidangji mekoktetter. Ano, karibo sali moko ya khen nung masü saka tanem-tanemi endoktsü meranger saka asen taküm aser temulungjang nungi yimya sübaba temenentem yabo khenyongi arizüka meyokra, tanem tanemibo kodanga maridoktettsü. Item ajakji temulung nung yur, taküm küm 'Alima Moko Machiba Anogo' omen nung aliba amaji moko sali achirtemi moko machitsü nangzükttetra, Covid-19 tongpang nung shilem tajung agiba dang masü saka Covid-19 ajanga taküm aser kibong nung temelenshi tajung tuluka adoktsü.

OLEMSABANG

LOCKDOWN MASÜ MOZÜKI TAJUNG ASER INYAKER PERIA MESHIDI

~ S. T. Yapang Lkr. Kohima

Iba covid-19 wara asen Nagalimai arur joko küm ajunger, saka ya tebilemdangtsü tulu lir ta rebrangteter.

Tang covid-19 puteta alir mozüki nung ishika anepaludar, saka kinungerbo ki meshibanger aser shirang nung dang tendangtsü ta asür, puteta alisang meshiranger nung kodasür par kinunger shirangba atatsü? Ya asayamenüba maparen ka mesüka lir, anungji covid-19 ya metendangtsü aser lockdown ya malitsü, shiba shirangdir pa/la dang mozüki bushitsü, mesüra ya azüoktsü tim ta bilemra puteta alir kinunger aser parnok olioraba ajak tendangtsü tim. Ajimesüra iba wara yaki talir ajak tonger mozüki nung masem nongdentsüa menua mali.

Tang nübur aser kin telungjemtemi lockdown meshitsü melen, mozüki shia doctor aser nurse peria shimtsü, iba den mozümora tajung peria akangtsüla, tang CHC mesüra PHC ka nung nisung noklangka iba wara yaki tonger oxygen nungdakra ajakji peria lir mali? Aser nisungtemji yamaji süsür sädaktsütsü asü koda? Light tao den külemi mozüki nung akaba kecha mapa meinyaki kümra koda? Asen lima light taru maka, süra asenoki ola madoki yamai dang lira ano putusa putua yamai dang alitsü, arung asenoki mozüki shia Generator tajung meshizükdi, iba den ishiba agia CHC nung Doctor pungu aser PHC nung asem meshitsüla, aser mozüki shia ICU inoktsü akangtsüla, Nagalimai sen marur masü, tanga nung indokba sen tera ajemer, mozüki tsütsülen temulung agütsütsü Govt. dang takangba ola yoktsü tajungtiba mapang lir, corona ya süiaka asenok mozüki aser inyaker tajung teti nungdaktsü. Ajisüaka mozüki tajung aliba agi iba wara azüoktettsü ta mebilemli, temesung lima nung ang azüoktetter lila. Asenoki Govt.-i latettsüa aliba SOP tashi anga anidaktsü tim.

Mozükii aobaji shiba südir shirangba mesüra timtem ka ali agiang aor, tang ama wara koba tangu mesashitetba tebilemstü adoker ya kanga tulu, minute ka majungdang nisungbaji süadoktsüba maparen ka lir, shiranger aser kinunger ajaki mozüki atongtsü yongyasete kima tatong den külemi oxygen inoktsüa anepalutsü imlaseta arur, ya inyakertem asoshi tayongzükba wadang tuluka lir, tang tashi kanga junga inyakdar ano tali tashi itshir bendanga agütsüa inyaksü ayongzükter.

Covid-19 agi shiranger nisung balala den jembidangogo, tesem kar nungbo Doctor aser nurse khen danga tonga marui shiranger kija toktsür, kar nungbo kinunger tanüker ka ana alitsü melar. Bilemdangdi asen kija ki ka nung shibanger ayu nung anema alira aika shiranga akümstü, külen asenok nüburtemi metettsü kaji mozüki nung inyaker timbaka iba wara yaki tongra shibai anepalutsü? Parnok taküm kümzüka alitsüji mezung mera ka lir. Saka mozüki nung corona putetar süsür shibangtsüba ya tim masü. Inyaker putettsü, tasüa asütsü akok, ibaji aben mozüki shibangtsü na? Shiba putet mesüra kong putet item taktangji mozü agi tekaraba nung shitoker lapoktsü masü na? Mozü agi shitoksü maka asü mozü agi shitokba nungji temulung malemer?

Asenok aikadi shiranga doctor ajurudangogo, doctor-i asen temang nung amdanger "ajungjako" ta ashiba oji shirang ajungtsü tenzüker ka akümer, tang wara agi kongshia anepalutsü tasak, saka Doctor-temi shiranger aliba taktang telungi meyinüra kima nungi danga "koma lir?" ta asüngdang nung shiranger aika asoshi aji mozü tajungtiba asütsü. Tang ya mozüki aika nung inyakertem Corona agi shiranger tonga arua yariba tatalokba lir, iba mapang shiranger aser kinungeri tepela nüktzü yima "tanga nungbo yamai meyarir, kechiba nenokibo onok anasa arua anepalur?" ta ashi nung "onok ya nisung tasür aliba kümzüktsü azüngba aser tejangraba ajak agi ibaji lir, ya onok mapa" ta langzür, koda tesüngmangtsüka parnok temeim aser aria bilembaji.

Yaküm lockdown lapokba sülen nungi taküm tanaben lockdown tashi asenok aika iba corona ya mena lir ta bilemndi, anungji temang mejungra tekaraba nung tendanga anepalutsüba dak alaka menua yura asen dang masü kinunger ajak asoshi takoksa asütsü, shibasa tendanga corona positive ta angashidir aoksatsü melen yakta putetba asoshi kanga pela bilemstü tim, ajimesüra tetsübu agi asenok aika süadoktsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Küm 170 dak tema Holy Trinity Tenla ki shibangtsüsa akümer



Holy Trinity Arogo Tenla ki aser Rev. David Austin noksa nung angur.

May 31, 2021: Coldhurst, Oldham (UK) nung Tenla ki ka nung küm 170 dak tema Khristantemi tekülem sentong agia arudar, aser tangbo iba Tenla ki kanga tejen küma shibangtsüsa tensa mapangi bener arutsüogo, ta Arogo leniri metetdaksü.

Coldhurst nung aliba Holy Trinity Arogo nung küm aika timtem balala ajangshia aruogo aser tang testüsa coronavirus wara ajanga ano tamajungba aküm.

Tesüiba küm ishika Godson Street nung aliba Arogo Tenla kidangi tekülem nung adentsü atema arurtem kanga ajema kümogo aser senotsü dak sendakba timtem ajangshidar.

Tenla ki jara aser tsümbang yanglushitsü kija atema-a Pound sen 50,000 nungdaker.

Shidi ka ajanga Rev. David Austin-i, "Tejashitsüka joko

onoki teti atema iba Tenla ki shibangtsü tebilemba lir," ta metetdaksü.

"Tebilemtsü onük balala aliba ajanga Tenla ki shibangtsüsa akümer, iba denji külemi yaküm küm piyong Tenla ki shibangba agi ano tamajungba aküm," ta pai metetdaksü.

"Area nung businesses aser organisation balalai inyakba ama onokia rongsenkettsüng asentenshitsü asü masüar ibaji tama asadangtsü," ta pai metetdaksü.

"Küm aika tsüngda Arogo nung züngsemtem tajemba-tajemba akümer aser tangbo Amongnü tekülem sentongtem nunga nisung ishika dang adener. Khristmas aser Easter sentong nunga nisung ishika dang aden, kechiyong Arogo züngsemtem ishika dang aser kanga tantsür-tambur timba

kümogo. Arogo nung züngsem lanurtema kar liasü saka aikati iba area toktsür ogo," ta pai metetdaksü.

"Tangbo iba area nung Bangladesh aser Pakistan nunger nütsüng timba kümdar, saka parnok Muslim nunger timba," ta pai ashi.

Iba Tenla ki ya 1848 küm semzüka liasü, aser tang mezüng coronavirus wara mapang Tenla kidang tekülem sentong agitsü memelaba agi Arogo senpong nung sen makai kümogo.

Rev Austin-isa, "Tang Tenla ki teyanglushidak, saka tarutsü atema Arogoi telemtetba agitsü," ta ashi.

Tang atemabo Tenla kidang Amongnü tekülem sentongtem agia atatsü, kiyimba sentong, asüpila sentong aser baptiba sentongtem agia atatsü.

Khristan doctor kati sarasademtsüba atema mapa nungi anendaksü

May 31, 2021: Madhya Pradesh nung coronavirus duty inyaker Khristan doctor kati coronavirus tashidak agi shirangertem atema sarasademtsüba aser iba tashidak nungi taneptsü angutsü atema Yisu dang sarasademang, ta ashiba atema mapa nungi anendaksü aser la anema ken o ka benokogo.

Madhya Pradesh state nung "Kill Corona" program kübok inyaker Dr. Sandhya Tiwari anema ken o ka benokogo; state nung anti-conversion ozüng kübok la anema ken o benok asütsüa akok, ta International Christian Concern (ICC)-i metetdaksü.

Iba program kübok May 22, 2021 nü doctor Tiwari-i Ratlam district kübok Bajna area semdangba mapang nung lai kibong aika dang taneptsü angutsü atema Yisu dang mepishia sarasademang, ta shia liasü.

Hombarnüa India nung nisung 152,000 dak coronavirus

putet aser iba tashidak agi shiranger nisung 3,000 dak tema süogo.

"Ozü state nung religious freedom jenjangji yamai lir. Tamangba yimsü melenshiba atema onok anema ken o benoktsü akok. Iba ya minorities anema inyakba lir," ta Khristan kati ashi.

"Medical tsütsü inyaker ka anema-a yamaji inyaker süra kecha meinyaker Khristantem anemabo iba dang nungjagi tamajungba inyaktsü," ta paisa ashi.

Madhya Pradesh state nung anti-conversion ozüng ya küm 50 tejaklen benoka liasü aser mapang shia iba ozüng tesashiba yanglushir. Iba ozüng kübok Muslim nunger aser Khristantem nem tai tongloksür aser amokmerener.

India nungsa Odisha, Arunachal Pradesh, Chhattisgarh, Gujarat, Jharkhand, Himachal Pradesh, Uttar Pradesh aser Uttarakhand state tem nunga anti conversion

ozüngtem benoka lir.

State kar nungbo Khristantemi kodak aser molumi indang-a jembitsü makok, kechiyong ibaji nisung kar temelung meyipdaksütsü atema amokmeren o jembiba lir ta züngshitsü.

Senden kar nung Hindu nunger nem chiyungtsü agütsüra ibajia Khristan yimsü dangi meyipdaksütsü atema mesüzükba lir ta züngshir.

"2014 küm Centre nung sorkar tasen tentetba sülen Khristantem anema inyakba kanga bulua kümogo. Hindu yimsü alia amangertemi Khristantem anema inyaker. Hindu nationalist temi India ya Hindu linük ta ashir, anungji Khristan densema tanga yimsü amangertembo India nunger masü ama züngshir. Iba dak alia Hindu nunger mesüra tribal yimsü amangertem Khristan yimsü dangi meyipra kinüngertemi parnok kanga reshikangshir," ta Open Doors-i metetdaksü.

ANOGO ABEN TSÜNGREM DEN

Tsüngremer Telangzüba Mission Sapi

Oba, na kechi koda kü dak lir aser ni Ne dak lir, yamaji parnoka asenok dak lidakjang, anungji Nai ni yok ta alimai amangtsü. Yohan 17:21

Samaa aliba lima alangzükba mission nung Tsüngremi aiben meimchir tesendaktepji shilem ka ama jembir (Yn. 13:20; Matt. 25:40). Kuli kaji temeshi metsü, aji chirtem tajung sotettsü aser parnoki Tsüngrem dang tashi angatsü aser parnok Tsüngremer mission nung amshitetsüsa alitsü (Mal. 2:14-15). Kasaji, arogoji Khrista temang lir. Arogo nung Tebu den mission ka nung alitsü makok (1 Kor. 12:12). Asen meketa alir tekümtet asoshi asenok o asenok na tsüngda tesendaktepji kanga tongtipang lir.

Yisu kangki-i matudang Pai nütsüngtem tasü itta alitsü, mesüra tamang katetta alitsü, mesüra Pai kechi sayu aji bilemteta alitsü sarasadem alitsü ta asenoki bilemtsü akok. Aji saka Pai parnok kati ka den meimtepa alitsü sarasadem. Tsüngrem meimtsü saka tangar dang memeimshitsübaji tanelaren tamakoktsü ta Yisui angatetta liasü.

Nai Tsüngrem meimba tetentangbaji nai tangar dang meimer asü masü aji shisadangtsüba lir. Asenoki ashir, "Kotak nung aliba Obala, tebilemtsü Na aser ni tsüngda nung masü. Ni kü mulung ajak agi na meimer. Ni tangar dang memeimtetter." Aser Tsüngremi ashir, "Ibaji tamakoktsü. Tangar, shirnok asoshi Kü chir asü parnok dang memeimra nai Ni meimtsü makok" (Yn. 13:34-35). Na meketa aliba khristantem den lungjema melira nai Khrista dangi tangar anir arutsü makok.

Mozambique nung Tsüngremi mapa inyakdar: Heidi Baker



American tsür missionary, Heidi Baker noksa nung angur.

May 31, 2021: America nunger missionary, Heidi Baker ya alima nung sensaktiba linük rongnung ka aser linük tamajungtiba rongnung ka, Mozambique nung lidar.

2017 küm nungi tenzüka ISIS den tesendaktep aliba kiralongrartemi Mozambique nung nisung 2,600 dak tema tepsetogo aser nisung 700,000 dak tema jenshiogo. Mozambique kübok Cabo Delgado Province nung IS-i Islamic yimli amenoktsü meranger.

Kiralongrar telok- Al Shabab-i iba region nung Arogo aika maakogo.

U.S. State Department-i ashiba agi, March 24, 2021 nü Al Shabab teloki Baker'er ki anasa Palma jila amakdang nisung aika jenshia liasü. Iba mapang nungji kiralongrartemi bendanger 12 densema nisung aika tepset aser karbo Palma tzüyümkümlen tekolak tangzüka lepset.

Baker indang Christian humanitarian organization- Iris Global ya küm 25 tejaklen Mozambique nung amenok aser

parnoki linük nung Khristantem anema inyakba aika ajangshia arudar.

Ajisüaka lai, "Linük nung Kibubai mapa inyakdar. Tang ama tensa ka nung Tsüngremi mapa tajung aika inyakdar aser Pai nüktzü aidoktsüdar," ta metetdaksü.

Laisa, "Tenla ki aika rongdoktsüogo aser kiralongrar den amalitep malirtem indang ki aser alu ajak rongoktsür," ta ashi.

Palma jila nung alir, Nina Diadara-ia, "Parnoki onok tepseter, ki rongdoktsür aser onok chirnurtem puer aoer," ta metetdaksü.

Tang linük nung Islamic kiralongrartemi timtem agütsüyonga Baker-i maneni Khrista osangtajung proker.

"Al Shabab ya tetsübuttsü telok ka lir. Ni ya ochishia ashir, ni melepsetdaksüner, ni puer moudoktsüner saka ano küm aika ni Khrista osangtajung maneni proker. Na Yisu dak amanger süra kiralongrartemi bushirtem rongnung na densema lir," ta Baker-i ashi.

OLONG PAITEP # 5830

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

- 2. Auo nung chiyongsü asenba - (7)
- 5. Mangyimba mapang - (5)
- 7. O tamendakdak - (4)
- 8. Pei dak malangba - (7)
- 10. Juli - (7)
- 12. Sen ayudak - (7)
- 14. Tenük agi ajitet - (4)
- 15. Tamajung aküm - (5)
- 16. Apuso - (7)

LANGTSÜNGLEN

- 1. Lenmang - (7)
- 2. Aor kidong ka tenüng - (6)
- 3. Tenarong maten - (6)
- 4. A _ _ _ g - (3)
- 6. Mopung apodoka - (7)
- ola adokdaksüba - (3)
- 9. Tongtipang tagitsü - (7)
- 10. Menungra bilem - (6)
- 11. Aiür - (6)
- 13. S _ _ _ k - (3)
- 14. T _ _ _ r - (3)

OLONG PAITEP # 5829 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner, 5. Alaka,
- 6. Satan, 9. Putet, 10. Tembar,
- 11. Tatok, 12. Amang, 14. Jala.



2021 MAY ITA LILI RESULT !

May ita nung Lili tajungtiba (First) shimteta tanü yangi lepshia agütsür. Lili zülur-i June 10, 2021 tashi nung Tir Yimyim Office nungi senpet agizüksü mepishia metetdaksür.

TEBUI ALOKBA MERENSHIR



AO OSHI ANGAZÜKDAK:
TANÜ ANGAZÜKTSÜBA OJANG
Jeli
 (adj) tangar dang tama / mapang matongdang (advance)
 · Senden metenzükdang lanurtem **jelia** sentep.
Jembi
 (v) tebang nungi ola adoka o ashiba (speak)
 * Tanü sannükeri o kanga junga **jembi**.



NAI-A YA METETTER MA?

JUNE ITA TONGTIBANG ANOGO KAR:

1-June	- World Milk Day
	- Global Parents Day
2-June	- International Sex Workers Day
	- Telangana Formation Day
3-June	- World Bicycle Day
4-June	- International Day of Innocent
	- Children Victims of Aggression
5-June	- World Environment Day
7-June	- International level crossing awareness day
8-June	- World ocean day
	- World Brain Tumour Day
12-June	- World day against Child Labour

(Maneni asüng adok nung...)

TANÜBO NAI LANGZÜANG
Q. India nung rongnung Reserve Bank of India (RBI) indang mezüng angh shiba liasü?
A. C. Rajagopalachari B. Osborne Smith C.L. K. Jha D. C.D. Deshmukh
 (Taruba adok nung onoki langzüksü)
YASHI ADOK TELANGZÜBA : 2012

SUDOKU # 5872					TELANGZUBA # 5871												
	8		5			1	7	8	1	9	2	6	5	4	3	7	
1				8	5	9		5	3	7	9	1	4	8	2	6	
9		5			6	3		2	6	4	7	8	3	5	9	1	
4	6	3	8	7	9	1		5	1	4	8	3	5	9	6	7	2
8		2				4		9	7	6	8	4	2	3	1	5	
		7		2	4		8		3	2	5	6	7	1	9	4	8
7	5	9	2	8			4	6	9	2	1	3	8	7	5	4	
			8	7	3			1	7	5	3	4	2	6	1	8	9
6					8	2		4	8	1	5	9	7	2	6	3	

OJANG LUTEP # 5416

- TETIMM :
- REKHUT :
- ARANUDG :
- MESEMTÜITSÜ :
- MAA :
- EMBIER :
- DGASANHI :
- TAYAK :
- NGDA :
- ADOKSÜIER :

OJANG LUTEP TELANGZÜBA # 5415
TAKAR DEN DANG MASÜ SAKA TILAR DENA TEMBAR
YANGLÜTSÜ MERANGANG

TAN HOPTA ATEMA - KOMA SÜLA ?

Q. Asenok Aotsür Aor kidang tangar nisung kilir mayu nunga koma süla ?



Faridabad, May 31, 2021: Faridabad nung aliba Old Faridabad Railway Station nung anogo asemnü tashi oxygen tankers anena aliba noksa nung angur. Tanker driver temi ashiba agi, tankers nungi oxygen 'leak' asüba ajanga parnoki mapang shidak nung COVID hospital balala nem oxygen magütsüterer.

India nung Covid case million 28 aser asür 3,29,100 jungogo

New Delhi, May 31 (Agencies): Tesüiba ghonda 24 tsüingda India nung ano nisung lakh 1.52 dak coronavirus tashidak putet aser ibaji tesüiba anogo 50 tsüingda anogo ka kija nung tajemtiba putetba lir; ghonda 24 tsüingda nungsa iba tashidak agi nisung 3,100 dak tema asü aser ibaji ita ka tsüingda anogo ka kija nung tajemtiba asüba lir, ta Hombarnü Union Health Ministry-i metetdaksü.

Tesüiba anogo ka tsüingda linük nung ano nisung 1,52,734 dak coronavirus putetba sülen linük nung coronavirus case ajak agibo 2,80,47,534 (million 28) jungogo.

Coronavirus tanaben prokba

sülen northeast state tem aser Ladakh dak alaka tanüingba states aser Union territories nungbo iba tashidak tasen putetba tajemba kümдар.

Tesüiba ghonda 24 tsüingda linük nung coronavirus tashidak agi nisung 3,128 süogo aser tang tashi nung iba tashidak agi asür ajak agibo 3,29,100 jungogo, ta health ministry-i metetdaksü.

Hombarnü Indian Council of Medical Research-i, tesüiba ghonda 24 tsüingda linük nung samples 16,83,135 tendangogo aser tang tashi nung samples ajak agibo 34,48,66,883 tendangogo, ta metetdaksü.

Linük nung iba tashidak agi shiranger shilem 91.60 (nisung

2,56,92,342) anepogo aser tang teshirangdakpur 20,26,092 lir, ta Health Ministry-i metetdaksü.

Tanü agi anogo 18 tashi linük nung iba tashidak putetba dang nungibo iba tashidak agi shiranger anepertem timba; tesüiba ghonda 24 kija nunga nisung 2,38,022 anep.

Anogo shia positive rate shilem 9.07 kümogo aser tesüiba anogo tenet tashi positive rate shilem 10 den tajemba lir. Hopta sasep nunga positivity rate 9.04% dang kümogo.

Union health ministry-i ashiba agi, linük tesem ajaklen vaccination drive kübok tang tashi nung coronavirus vaccine dose 21,31,54,129 agütsüogo.

Central Vista project ya amajok masü saka nüngdak: Hardeep Puri

New Delhi, Monupii/May 31 (Agencies): Hombarnü Delhi high court-i Central Vista project maneni inyaksü temelaba agütsüba sülen Centre sorkari, Central Vista project ya amajok mapa ka masü saka nüngdak, ta metetdaksü.

Osangbenertem den jembidang Union Minister, Hardeep Puri-i, Central Vista redevelopment plan ya amajok nung inyakba project ka masü saka nüngdakba project ka lir, ta ashi.

Puri-isa, tang project ana-Parliament building aser Central Vista Avenue na dang yangludat aser ibaji sen crore

1,300 indoka yanglutsü, ta metetdaksü.

Union Housing & Urban Affairs Minister-isa, iba project inyakba ajanga akhi nüngshi kiojentem mekongshitsü, ta metetdaksü.

Parliament Building tasen yanglutsü aser Central Vista redevelopment ya coronavirus wara metenzükdang yongi agizüka liasü, ta minister-i ashi.

Opposition party balala nungi lenirtem aser lokti tentet balala nungi lenirtemi, tang linük nung coronavirus wara tulu aliba mapang ka nung sorkari Central Vista project inyakba ya tim masü, ta Centre sorkar aitsüdar.

Coronavirus wara mapang nung iba project inyakba ya anena alitsüla, ta temepishiba ken o ka agütsüba Hombarnü angadanga mapang nung Chief Justice, D N Patel aser Justice, Jyoti Singh nati akümba bench-i iba project maneni inyaksü temelaba agüja liasü.

Central Vista project kübok Parliament building tasen aser Common Central secretariat ka yangluba den külemi Rashtrapati Bhavan nungi India Gate tashi kilometer 3 lenmang yanglushitsü, Ato kilonser ki den office tasen aser Vice President Enclave tasen ka yanglutsü.



Hyderabad, May 31, 2021: Hombarnü Hyderabad nung Telangana Finance Minister, T.Harish Rao aser Chief Secretary, Somesh Kumar nati Vaccination alizükba aser Drivers Vaccination dak sendakba review senden amenba noksa nung angur.

Tanü Jaishankar leniba nung BRICS Foreign Ministers senden amentsü


New Delhi, May 31 (Agencies): Mongolbarnü External Affairs Minister, S Jaishankar leniba nung BRICS foreign ministers senden amentsü aser iba senden nung Covid-19 tensa, regional aser alima nung tongtibang onüktem nung o lemteptsü.

Iba senden nungsa kiralongra anema inyakba onük jembitsü. Video-conferencing ajanga amenba senden ya Jaishankar leniba nung agitsü.

"Tang BRICS Chair ya India lir, ajioda June 1, 2021 nü India leniba nung BRICS ministers of foreign affairs/International Relations senden amentsü," ta Hombarnü Ministry of External Affairs-i sangdong ka ajanga

metetdaksü. Senden nung Brazil minister of foreign affairs, Carlos Alberto Franco Franca, Russia foreign minister Sergey Lavrov, China foreign minister Wang Yi aser South Africa foreign minister, Grace Naledi Mandisa Pandor nungeri shilem agitsü.

"Minister temi tang coronavirus tensa indang tebilemba lemsateptsü, asen mapang nung tayongzükba onük balala atema jembitsü, alima aser regional tongti tebilemstü onüktem nung o lemteptsü, sustainable development, kiralongra anema inyakba atema jembitsü aser BRICS züngsem linüktem amalitepa inyaksü atema jembitsü," ta MEA sangdong nungsa shia lir.



Prayagraj, May 31, 2021: Hombarnü World No Tobacco Day anogomong nung Prayagraj (Uttar Pradesh) nung social worker, Rajendra Kumar Tiwari-i moko machitsü atema nüburttem nem awareness agüja senzüba noksa nung angur.

States aser UTs nem Covid vaccine dose crore 23 agütsüogo: Centre

New Delhi/Bengaluru, May 31 (Agencies): India linük tesem ajaklen vaccination drive atema India sorkari tang tashi nung states aser UTs nem coronavirus vaccine dose crore 23 (23,11,68,480) agütsüogo, aser iba nungji angati agütsüba aser state-i alizükba densema lir, ta Hombarnü Union health ministry-i metetdaksü.

Tang states/UTs ket nung coronavirus vaccine dose crore 1.75 (1,75,48,648) lir, ta Health Ministry-isa metetdaksü.

Iba dak alia taruba anogo asem tsüingda states/UTs nem vaccine dose lakh 2.73 (2,73,970) agütsütsü, ta ministry-i metetdaksü.

India sorkari states aser UTs yaria Covid vaccines angati agüja arudar aser states/UTs-i vaccine indangindanga alizükba maparen nunga Centre sorkari yaritepdar.

"Coronavirus prokba nokdangtsü atema tendangba, track asüba, treatment agütsüba aser tetuyuba agütsüba den külemi iba wara nokdangtsü atema India sorkar

asoshi tongti tongshi rongnung kaji Vaccination lir," ta Health Ministry-i metetdaksü.

Ano tanga osang ka nung Centre sorkarisa, black fungus treatment atema sorkari states aser UTs nem Amphotericin-B mozü 30,100 tali agütsüogo, ta metetdaksü.

Hombarnü Union minister for chemicals & fertilisers, D V Sadananda Gowda-i twitter ajanga, "Tanü states/UTs aser central institutions ajak nem #Amphotericin-B mozü 30,100 tali agütsüogo," ta metetdaksü.

Paisa, Karnataka state nem Amphotericin-B mozü 1,930 agütsüogo aser ibaji densemabo tang tashi nung state nem iba mozü 12,710 agütsüogo, ta metetdaksü.

Karnataka state health department-i ashiba agi, tang tashi nung state nung nisung 1,250 dak black fungus putetogo aser iba nungjagi nisung 39 aser nisung 18 anepogo.

Tanüingba nisung 1,193 ji tang treatment tagidak lir, ta health department-isa metetdaksü.

Japan nung arishi küm 65 tekübok alir ajak nem vaccine agütsütsü

Tokyo, Monupii/May 31 (Agencies): Japan nung arishi küm 65 tekübok alirtem nem vaccine agütsü aliba sentong ya tamasa tanga tashidak keta alirtem aser care facilities balala nung inyakertem nem agütsütsü sentong yanglur liasü.

Ministry-i, municipalities tem dang June ita tom nungibo arishi küm 65 tekübok alir lisopur shirnok vaccine agütsü temsüa lir, parnok ajak nem vaccination vouchers agütsü tenzüktsü tetuyuba agütsüatokogo. Ajisüaka tang tanga tashidak keta malirtema taruba ita voucher anguba sülenbo vaccine agitettsü.

"Tanga tashidak keta alirtem ajak vaccine agütsü ata nungbo vaccine agütsüba sentong ya kodang tembangjar memetet," ta health, labour and welfare minister Norihisa Tamura-i ashi.

Priority vaccinations agizüktsü temsüa alirtemi parnok sasep nung municipalities tem nem osang agütsütsüla, kechiyong sorkar ket nung vaccine agütsü asoshi nisung kwi temsüa lir, iba indang data mali.

Kyodo News sangdong ka ajanga ashiba agi, Japan nung vaccine agütsütsüba sentong ya February ita front-line health

workers tem nem agüja tenzük aser April ita arishi küm 65 temapur nema agütsütsü atsülangtsü. Sorkari, July 31 nü tashi nung tintet rogotem nem vaccine agütsüba sülen tanga tashidak keta alirtem aser nursing homes balala nung inyakertem nem vaccine agütsütsü aser nüburttem ajak nem ta tarensena vaccine agütsütsü sentong yanglu.

Ajisüaka sorkari vaccine agütsüba sentong ajungketshitsü merangdar. Tanga linük tem den medemdangra Japan nung vaccine agütsüba sentong kanga meyilongi aoer aser tanga tashi nung nütsünyongsük shilem trok nem dang vaccine mezüngbuba shilem agütsür lir.

Kasa mapang nung Tokyo, Osaka aser tanga prefectures tenet nung Hokolbarnü Covid-19 state of emergency hopta asem atsülangtsüogo.

Self-Defense Forces personnel temi achaayangba Covid-19 vaccination center tem lapoker hopta la lir tanü nungi inyaksangshi tenzükogo.

Linük yimtiba nung Olympics tenzüktsü hopta ka dang anunga lia Tokyo, Osaka aser tanga prefectures tenet nung Covid-19 state of emergency benokogo.

Virus ya China-i lab nung yanglu ta bushiteta lir

Monupii/May 31, 2021 (Agencies): China nung scientist temi virus ya Wuhan nung aliha lab nung yanglu aser virus ya pasasa lah dak nungi jakzük ama reprangdaksütsü mechi 'reverse-engineering versions' ajanga parnok tsüngsü nembangtsü meranga, ta bushiteta lir.

Novel coronavirus SARS-CoV-2 virus ya pasasa jakzükba tejangja mali aser iba ya Wuhan lab nung "Gain of Function" project nung inyaker China nung scientist temi yanglu, ta British professor Angus Dalgleish aser Norwegian scientist Dr Birger Sorensen nati research tasen ka agiba nung shia lir.

Scientist temi China nung longpok nung aliba lah dak anguba natural coronavirus "backbone" agitet aser "spike" tasen ka nung inokja kanga tesashi aser mela mela menatepa aoba COVID-19 kumdaksü, ta research tasen agiba ajanga ashir.

Research agirtemi COVID-19 sample nungi "unique fingerprints" ngutet, koba laboratory nung melenshütsü merangba nungi adokba alitsü, ta research agir nisung ana yagi ashi.

Kaket zülur Dalgleish aser Sorensen nati tena indang kaket nung ashiba agi, China nung küm ka 'retro-engineering' asüba indang kuli tejangja nguteta lir saka tazüng-tashir

aser tongtipang journals temi senzüka yutsü, ta DailyMail.com ajanga ashi.

China nung lab tem nung data raksatsü merang, miima ayutsü mesüra indoktsü merang aser China nung iba inyakyim anema jembiba scientist tem ola madokdaksü aser sama, ta study nung aija lir.

Iba research ya DailyMail.com ajanga ngutet, aser nisung meyerijang aika takum samatsüba virus yangluba nung China shilem lir ta tang o intepa aliba tali tesashiba akumtsü akok.

Tapak 22 aliba paper ya scientific journal Quarterly Review of Biophysics Discovery nung adoktsü lir, aser yangji Dalgleish aser Sorensen nati China nung scientist temi kar America nung university nung inyaker dener coronavirus yanglutsü atema hadir yangluba indang medentepa zülua lir, ta ashir.

"Gain of Function" projects nungya pasasa poktetba virus tem tali temelaba nung menatepa odoktsüba densema lir, aser iba project ya taoba

US Tir Barack Obama-i nokdanga liasü.

Pasasa poktetba virus wara ya tanem tanemi melenshia tali temelaba nung menatepa aotsü saka tashidak bo madokdaksütsü ta imla liasü, saka COVID-19 case nung yamaji matalok, ta scientist ana yagi zülutsü.

Tashidak wara ya tenzükba sülen China nung scientist temi COVID-19 virus indang sample tem agizüka iba virus ya pasasa poktetba amai kumdaksütsüba yanglushi, ta Dalgleish aser Sorensen nati ashi.

China nung scientist temi parnok shisatsü lemsateptsü molunga liasü saka parnoki melemsateptet mesüra sama, ta scientist ana yagi ashi.

Virus ya Wuhan institute of virology nung security ajema alidak nungi adok, kong Gain of Function research ya agia liasü ta amanger, ta Sorensen-i DailyMail.com dang ashi.

US Tir Joe Biden-i May 26 nü US itdangiter tem dang COVID-19 poktetba indang tanaben bushir anogo 90 tsüngta pa nem osang agüjang, ta shia lir.

Northern Nigeria Islamic school ka nungi kaketshir aika pua bener ao

Tegina, Monupii/May 31 (Agencies): Prangbong bona aliba nisung telok kati Nigeria north tsütsü Niger state kübok Islamic school ka nung azünger kaketshir aika pua bener ao, ta police aser state sorkar ketdangsurtemi ashi.

Deobarnü iba lendong atalokba mapang school nung tanur 200 shi liasü, ta Niger state sorkari Twitter nung metetdaksü aser nisung kwi pua bener ao'ar ano mejangjateti lir, ta ashi.

Northwestern Nigeria nung aliba university ka nung azünger kaketshir 14 pua bener oa anogo 40 yur chiokba sülen anogo ka lir iba lendong ya ataloker.

Niger state police indang odongtar kati sangdong ka ajanga ashiba agi, prangbong bona aliba nisungtem yagi motorcycle nung arua state nung Rafi local government area kübok Tegina jila nung Deobar nikongdang 3:00 ako (par mapang) meta timtem ya agütsü.

Lendong agütsürtem yagi taochi mesayui injang khaloktsü aser Salihu Tanko Islamic school nung aliba tanurtem pua bener ao. Iba mapang nisung ka khaset aser ka dak kangasa mejungi yirutsü, ta pai ashi.

Tawa northern Nigeria kübok school aser university amakba atema senotsü meshitsü mechi tashiyim agi nisung pua bener aoba prangbong bona alir telok tem dak tai tongloktsür, shirnoki December ita nungi tenzüka tang tashinung kaketshir 700 dak tema pua bener ogo.

School kibur Abubakar Tegina-i osangbener den phone ajanga jembiba mapang, pa nü agi ngua lendong ya atalok, ta ashi.

"Motorcycle 20 aser 25 tsüngta nung prangbong tesashi

bener nisung mena aliba ni nguogo. Parnok school telungi ait aser kaketshir 150 mesüra tali bener ao," ta Tegina-i ashi, shiba school nungi feet 500 shi pilar alir.

"Kaketshirtem pua bener aoba ya tejangja memetet, kechiaser iba lendong atalokba mapang parnok timba school-i maru liasü," ta pai ashi.

Tegina-i ashiba agi, iba school nungya tanur arishi küm tenet nungi 15 tsüngta 300 shi lir. Kaketshirtem pei kidang alir aser class nung adeni dang aruru, ta pai ashi.

Lendong agütsürtemi kaketshir 100 dak tema pua bener ao saka parnok atema kangasa tanur ta bilemba, arishi küm pezü nungi 12 tsüngta alirtem meyipa yok, ta school ketdangsur kati ashi.

State sorkaria sangdong ka nung, lendong agütsürtemi kaketshir 11 chiokogo, ta ashi.

Tawa kaketshirtem pua bener aoba ya timba boarding school tem nungi lir.

Prangbong bona aliba telungpur telok tem yagi northwest aser central Nigeria nung aliba yimtsüngtem nungi kiset shiruru auyar aser sen yong alangtsü mechi nisungtem pua bener aor.

April 20 nü prangbong bona aliba nisung telok kati northwest Nigeria nung Greenfield University telungi aita kaketshir 20 shi apu aser iba mapang university ketdangsur ka tepseta liasü.

Anogo ishika lir kaketshir pongu tepset aser Deobarnü kaketshir 14 chioka liasü. Item tanurtem chiochtsü atema kinungertemi sen 180 million naira (\$440,000) shi agütsüogo, ta yangji aliba osangbener temi ashir.

Rohingya nung 4,000 dak temai longkak ait



Chittagong, Monupii/May 31 (Agencies): Bangladesh kübok asetkong ka nung aliba Rohingya nung meyirejang aikati Hombarnü longkak aita liasü. Asetkong nung parnok talitsü jenjang kanga majungba anema parnoki nokdak.

December ita nungi tenzüka Bangladesh-i, refugee100,000 anir aotsü sentong yanglur aliba nungi nisung 18,000 bo Cox's Bazar nungi Bhashan Char asetkongi anirogo. Cox's Bazar nung tang refugee 850,000 shi kanga timtema litepdar.

Rohingya nungertem ya 2017 küm Myanmar nungi jenjang aoertem lir.

Hombarnü nisung 4000 shi-i

longkak aita liasü, ta police-i ashi. Kasa anogo United Nations refugee agency (UNHCR) nungi ketdangsurtemi iba asetkong semdang.

"Tanü UNHCR ketdangsurtem helicopter nung arua asetkong nung anenba sülen iba tesem nung aliba Rohingya nungertem maziükteti aküm," ta local police tekolakba Alamgir Hossain-i AFP dang ashi.

"Parnoki long onokja warehouses nung glass tem raksatsü. Parnok police dangi aru aser parnok idaki meliner ta ashi."

Rohingya nungertem kati long onloktsüba osang jangjatsüogo

aser UNHCR ketdangsurtem anenzüka aliba kidangi parnok meyoki police temi sota ayu ta ashi.

December 4 nü mezüngbuba telok anir aoba sülen Rohingya nungertem aikati AFP dang, iba asetkongi aotsü asoshi parnok amokmeren aser tazüka den zükogo, ta ashi.

Ajisüaka Bangladesh sorkari iba taitsüba ya magizük aser ashiba agi asetkong nung oa alitsü atema kecha tetsükdaksü mali aser Cox's Bazar camps dang nungi iba asetkong nung facility tajungba lir ta ashi.

Kasa mapang nung UN-i ashiba agi, iba inyakyim nung parnok densema mali.

Anjong Tenari Nung Anü Luogo Nih...



Asür Wt. I. Katila Pongen (Chuchuyimlang) Tasüba Anogo : 25th May 2021.

Aya, yamai kara ajungbena dang küna toktsür aoba ya pungmang ka ama bilema Temolungjang ajak manga-shimaka kümdaktsüogo nih... Anügdang Anü tesangwa aser Aonung Itaya tobur ajung mali ama, Nüngjang Petinu sangwa arem medem, Alima sentsü ajak jenogo nih... Asen Kilong-kima ajak züngdangpia konga kümogo, na mali küna rongjenseta koda alitsü ta tzüremseta bilemer. Nai jembiba, inyakba, libalirua aruba aser küna meima anepalubatem bilemtetdang temolung kanga ayanga züreper. Oda, na küna asoshi tasü tait, tetemjen aser tetemtsü Tetsü tajung ka liasü, molungdokba Kinungtsü tajungtila ka, shisalen sayur takotet ka, adianu tajung ka, medemer tajung ka ama lia aruogo. Nü meimbo kangasa ulura liasü, na shirang yonga, timtem khuret aliyonga, nai menürema küna anepaluba bilemteter. Aonung arur külen küna tiptema anisüngzüka mejangdaksür nai ayaterm aser ankongpang tashi asen kibong asoshi inyakba nüklai arur. Nai küna meimba, anepaluba, tenzüka, ajungba, molung süneptsüba, Shisataka sayubentsü O-tem agi küna aniba kodanga mamatetsü.


Anojungi, na Longritzü adena orr joko küna den Alima balaka nung alitsüsa atongtetba ya kechi tia ka ta nüktzü yimjen yima nemjema menungrar. Saka ya Tsüngremer sentong ka asü südi ta bilemer, kechiyong na shi-temang nung taneptsü mangu iba akümüli tembangaka, na Tanela nungbo taneptsü ngua renemer Kibuba dangi aoba jangja meteter. Anojungi na kecha temenungrai oangma, künübo asenok asemprong tasen Yirusalem nunggi ajuruteptsü yongya atar.

-Temeim Kinungbo & Jala.

TEPELA LEMSATEPER

"Ni rara tajungji raraogo, ni alizüng tonga asemogo, ni tamangji yuogo" II Timoti 4:7

Onoki teti meima aliba obala/ kinungpo Lt. **Imtiteka Amri** ajungben iba alima nungi pila-a, kodanga meshilangba limai aoba mapang, kecha dena metemdangtsü makokba mangyim nüktzü den shisa bulu tia nung alidang. Ozü aria bilemba den temeim shisatsü bener ana aser talang nungi tamang sarasadem den rongsen agi yariogo, nenok ajak dang iba zulu ajanga tsüngdong marutet nung pelaba lemsateper.



ASÜ : 08/05/2021

Tsüngrem tajungsangi kija, kibong, lokti balala ajak moajangma ta onoki sarasademtsür.

Temeim kinungtsü, chirnur, semchisemnur, anükapang aser kinungertem

Office of the Dimapur Molungyimsen Senso Telongjem

MANGYIMER

Dimapur nung Molungyimsen sensotem rongnung tambutisang **Wb. C. Imtinungsang Nokdir**, Retd. Director, Department of Agriculture, Nagaland 31st May 2021 anogo onok rongnungi pilaa aonung sensosanger ajaki mang ayimer.

Pa taküm liyonga arudang shisashiba nung mongin aser lennir tajung ka liasü. Taoba mapang pai Ao Kaketshir Mungdang (AKM) nung Tongti Tezüür ka ama inyakogo. Pa M.Sc (Agri) renemer iba department nungi anisüngzüka anguba sülen yimden aser arogo maparen ajak nung shilem tajung agia aruogo. Ozü tsürabur tajung ka tanü alima nungi pilaa aoba atema kanga nemjemer aser senso ajaki asüri toktsür aoba kibong den asükhü lemsateper.

Tsüngremi pa tanela teti atema tepeladak yujangma.

Sd/- **T Alemba Jamir**
Tir, DMST

Sd/- **Imkongtangit Aier**
Tezüür, DMST

Kohima nung 'World No Tobacco Day' mungogo



Kohima, Monupii/May 31, 2021 (TYO): 'World No Tobacco Day' anogomung shilem ama, Hombarnü

mamshiba/achiajem masüba rejutem (tobacco free educational institutions) indang kaketshir atema 'virtual' ajanga poster yangluba sentong ka ayongzüka liasü, ta sangdong ka ajanga metetdaksü.

Iba virtual sentong nung, 'tobacco free educational institution' 22 nungi kaketshir 57 agi shilem agiogo.

District Tobacco Control Cell Kohima indang District Nodal Officer, Dr. Arenla Walling-i, 'World No Tobacco Day' anogomung shilem ama Kohima nung IEC inyakyimtem achaayanga agiogo, ta metetdaksü.

Arushi-i COVID-19 Relief Campaign ka tenzüksüogo



New Delhi, Monupii/May 31, 2021 (Agencies): Arushi Nishank, shiba actor, social activist, kathak exponent den ang environmentalist, film producer aser Sparsh Ganga indang co-founder lir, lai India nung coronavirus tenokdangba ajanga timtem nung alirtem yaritsü asoshi mapa tajung inyaksü mera balala agidar.

Uttarakhand aser tanga tesem nung COVID-19 relief agütsütsü nükjidong nung lai project balala tenzüksüogo. Sparsh Ganga ta tajangzüka magiba (non-profitable) mapatong ka lir, koba 2008 küm Uttarakhand nung tenzüka liasü. Ganga ayong aser iba temeküt libajen kümzüka yutsütsü nükjidong yur lai iba mapatong tenzüksü.

COVID-19 relief mapatong shilem ama, Arushi-i jang-o-tsü (wheat flour, Rice, Dal, Tea aser

Biscuits) den medical kits - oxygen concentrator, masks, steamer, PPE kits, sanitisers, digital thermometer, oximeters aser vitamin C tablet tem yoktsü. Item jang-o-tsü aser medical oset den külemi sanitiser aser mask densema 200 nungi 500 tashi kits talila yoktsü sentong lir aser item oset ya Haridwar nung Sparsh Ganga team ajanga lema agütsütsü.

Item rongnung oset karbo Haridwar indang DM nem bendanga agütsütsü aser tanünga osettem Uttarakhand telungtet nung lema agütsütsü.

Uttarakhand nung manemer (Covid-19 agi shirangertem anepalutsü) yipden, shiranger anepalutsü aser tanga facility atema Arushi aser lar Sparsh Ganga team-i helpline number ka lapoktsüogo.

Tang, India nung Covid-19 wara tanaben adoker külen nungi

Sparsh Ganga team-i mask aser sanitizer tem lema agüja nüburtem yaridar.

Arushi-i item maparen dak sendakba kar Instagram ajanga noksa tem lemsatepogo.

"Ni Uttarakhand nung soa intet aser tang ama mapang asenok ajak longjemer #Uttarakhand nung timtemer tem yaritsü nüngdaker. Sparsh Ganga team den longjemer Covid-19 relief campaign tenzüksüogo aser onoki Uttarakhand telungtet tesemtem dangi jang-o-tsü aser medical kits yoktsü. Iba campaign atema onok den teka amtepba telok -Sandeep Aggarwal Foundation danga pelaba metetdaksür," ta lai lemsatep.

Covid-19 relief maparen dak sendakba nung jembiba mapang, Arushi-i ashiba agi, "Asenok ajak meimchir ka ka lir ta sayutsü asoshi tang mapangba ya lir aser asenok ajak longjemer inyak nungang iba wara koktettsü. Nia Uttarakhand nung soa intetba jala ka lir aser onoki akok tashi tajungtiba nung nübur tenzüksü terenemba lir."

Maneni, acting tsütsü, Arushi-i music video - Wafa Na Raas Aayee nung tesüsa shilem agiba nguogo.

India nung 5G benokba anema Juhi Chawla-i ken o benok

New Delhi, Monupii/May 31, 2021 (Agencies): Alima den jangyu medema, India-a technology aser digital communication tsütsü tejakleni aoba aser ajangzüka tem sayutsü nükjidong yur '5G Race' nung ajemokogo.

Actress aser Environmentalist Juhi Chawla-i, iba maparen dak sendakba nung nübur asoshi tebilemstü tulu adokba lemsatepogo aser India nung 5G amenoktsü sentong anema lai ken o ka benokogo.

5G atema telecommunication industry indang mapatong atalokra, iba alima nung nisung, shiruru, ozü, ali nung arazüba shiruru tila aser süngdong ka danga anogo nung ghonda 24, küm nung anogo 365 tashi RF radiation' metizüktü, koba tawa tanü amshiba (4G) dang 10x nungi 100x ben agi tuluba/tesashiba lir. Item 5G asalentong ya meimchir atema kanga dang lendong aser iba den külemi alima ajunga indang ecosystem nung teti atema teraksa adokdaksütsü.

Kasa onük nung ajemdaker jembiba mapang, Juhi-i, "Technology tsütsü renloka aser tejakleni aoba anema onoki meinyaker. Alima nung technology ajanga product tasentem adokba ajanga asenok maparen ayongdaksür aser asenoki item product jangratema amshir. Ajisüaka, item device tem amshiba

mapang, aiben dang tebilemstü adoker, kechiyong wirefree gadget aser network cell tower tem nungi RF radiation adokba/ agütsüba dak sendakba nung onoki bushisüngdanga aser study asüba mapang, iba radiation ya meimchir temang atema kanga dang lendong ta kuli aika lir," ta lemsatep.

Advocate Deepak Khosla ajanga Juhi-i benokba petition nung, clinical aser experimental nung shiruru aser süngdonglidong indang DNA, cells aser aser organ system nung kongshiba den nüburtem cancer, temolungjang tashidak aser diabetes tem adokba ya wireless mobile phone technology ajanga adokdaksüba electromagnetic pollution ajanga lir, ta shia lir.

Justice CHari Shankar, shiba dangi iba ken o benoka liasü, June 2, 2021 nü iba ken o angadangtsü atema bench tanga kati belenogo.

Maneni, tan ita tetenzüklen, Department of Telecom (DoT)-i India nung 5G tendangba maparen achaayangtsü atema telecom company talisa Reliance Jio, Bharti Airtel, Vodafone Idea aser MTNL indang application agizükogo. Kasa mapang, item company dang Sorkar tetuyuba ama China nung Technology mesüra teyari kecha magii maparen inyaksü asoshi metetdaksüogo.

Awang Konyak-i Nagaland online freestyle football tetoktepba kokogo



Kohima, Monupii/May 31 (TYO): Kohima Town Club (KTC) den longjemer Naga Manu Production (YouTube channel)-i ayongzükba Nagaland Online Freestyle Football Competition 2buba arishi küm 16 tain Awang Konyak-i kokogo. Awang-i kümnabuba iba tetoktepba kokogo.

Kasa mapang nung Ruokuokholie Medom (Gr. Naga)-i tanabuba jenjang nguteta liasü. Tetoktepba nung shilem agirtem round ana tashi toktepba sülen May 31 nü result sangdongogo.

Mezüngbuba round tembangba sülen tetendangertemi asayatem rongnung tajungtiba pongu shim, aser takoker sangdongtsü atema tetoktepba nung shilem agirtem dang minute kaka video (unedited) yanglur yoktsü metetdaksü.

Temetetsükaji taoba küma Konyak-i iba tetoktepba akok aser GR Naga runner's up liasü.

Tetoktepba tetendangertem rongnung Punjab freestyler Aman Dhillon, state football coach tem state nung freestyler tem, veteran aser asayar tejentem densema liasü. Parnoki all round, originality, execution, control, difficulty ta

lenla balala nung tetoktepertem tendang.

KTC-i ashiba agi, Naga nung freestylers tem nem parnok sempet sayatsü atema sabang agüja parnok ajungkettsü aser state mokdang aliba mapang football asayatem pei temang anepalua alitsü atema ajungmesotsü asoshi iba tetoktepba ayongzüka agi.

KTC-i senotsü teyari agüja Awang Konyak nem senpet sen 6,000 aser runner's up GR Naga nem senpet sen 3000 agütsütsü.

Maneni Mon district nungi arishi küm 11 tain asayar Taiwang Konyak nem emerging youngster award naroküm den goalkeeper Neithovilie Chalieu (Ryntih SC Club Shillong)-i senotsü teyari agüja senpet sen 1000

agütsütsü. Kasa mapang nung pa indang video repranger lakh 1 dak tema liasü aser iba tetoktepba nung pa indang video tem nisung timbai repranga liasü.

Tetoktepba nung tanobusangji Peren district nungi arishi küm 9 tain Hangria Zeliang liasü aser pa nema Kelhou Suohu (Proprietor Touch Enterprise for event management)-i senotsü teyari agüja senpet sen 1000 agütsütsü.

Lanurtem ajungmesotsü atema iba tetoktepba nung takoker nem Naga Manu Production customized t-shirt kaka agütsütsü.

Tanga top-5 freestylers tem rongnung Thungcheva Lotha, Aching Anns aser Merendo Jamir nung densema liasü. Hopta ana toktepba mapang YouTube channel nung iba tetoktepba repranger lakh 2 dak tema liasü.

Taküm iba tetoktepba nung Kohima, Dimapur, Mokochung, Mon aser Peren district nungi asayar 12-i shilem agiogo. Mezüngbuba kümbo asayar 37-i tetoktepba nung shilem agi. Ajisüaka takümbo tetoktepertem timba football freestyle nung experience aika ngur alirtem timba liasü aser ibayongji takoker shimtsü atema kanga tasak liasü, ta tetoktepba ayongzükertemi ashi.

KKR nungi asayar Pat Cummins IPL nung masayatsü

Sydney, Monupii/May 31 (Agencies): Kolkata Knight Riders pacer Pat Cummins-i, UAE nung asayatsü aliba tanungba IPL asayatem nung shilem magitsü telemtetba agioigo. Kasa mapang nung Cricket Australia-i iba asayamung nung tanungba asayatem asayadaksütsü masayadaksütsü iba indang telemtetba ka agitsü nüngdaker, kechiyong bio-bubble telung nung asayatem tekelok mesüngjemdaksür.

"Cummins-i multi-million dollar IPL contract yanglur liaka pa iba season nungbo IPL tanungba asayatem nung shilem magitsü ta shiogo," ta 'Sydney Morning Herald' sangdong ka ajanga metetdaksü.

IPL 2021 tanabuba leg ya September ita UAE nung asayatsü.

October-November ita India nung T20 World Cup masaya tsüngda asayatem workload bio-bubble nung lakteta amungba ya Cricket Australia-i asadangshitsü nüngdaker.

Covid-19 wara pokteter aliba ajanga India nungi Maldives ajanga Kidangi

meypa aoba sülen Australia nung asayatem quarantine asütsüsa aküm.

"Bio-secure bubble ka nung ano mapa aika intoktsüba ya asayatem mental health atema ajung majung aji CA-i telemtetba agitsüla," ta kasa osang ajanga ashi.

ECB Director of Cricket Ashley Giles-i, June nungi tenzüka asayamung aika nung shilem agitsü lir asünung England nung asayatem IPL asayamung tanungba nungbo masayatetsü akok ta shiogo.

Kasa mapang nung Australia team June tatemlen West Indies nung oa asayatsü aser iba sülen Afghanistan den test aser Ashes series asayatsü.

Maneni Australia team August ita Bangladesh nung oa asayatsü ako, saka ano mejangja. Ajisüaka Bangladesh board-i T20 asaya pongu asayatsü atema sentong yangludar.

Taküm IPL nung Australia nung asayar, support staff aser broadcasters 40 dak temai shilem agiba nguogo. IPL nung ano asaya 31 asayatsü anunga lir.

CWI aser CPL na metsükteptsü atema sensaksemndar: BCCI

Monupii/May 31, 2021 (Agencies): UAE nung September ita IPL nung tanungba asayatem kecha tetsükdaksü maka asayatsü atema Caribbean Premier League hopta ka mesüra anogo 10 jelia tenzükdaksütsü atema BCCI-i Cricket West Indies mesüzüksü merangdar. Tang jembishinüa aliba ama sentongtem atalokra asayatem

bubble ka nungi kati bubble ayong ayonga otettsü.

India nung COVID-19 wara asendenshir poktetsüba ajanga IPL 14buba tom nung thinentsüsa aküm, Ajisüaka BCCI-i Honibarnü Indian Premier League ya UAE nung September ita tom nung tenzüksü atema temelaba agütsüogo.

CPL ya August 28 nungi

tenzüka asayatsü aser final asaya September 19 nü asayatsü lateta lir aser kasa mapang nung IPL nung tanungba asayatem ya September 18 nungi tenzüka October 10 tashi asayatsü imlar aser iba ajanga asayatem asayamung ka nungi kati aoba mapang süngjem süngjema anisüngzüksü mapang magütsür.

"Onoki tang Cricket West Indies den sensaksemndar. CPL ya anogo ishika jelia tembangtsü imlaa atar aser iba ajanga asayatem ajak Dubai-i bubble ka nungi bubble kati belener aoba nung teyari agütsütsü aser asayamung metenzük tsüngda quarantine asütsü anogo asem latetja aliba tembangtetsü," ta BCCI source kati Deobarnü PTI dang ashi.

BCCI aser CWI na anogo dak sendakba nung haihaora

makatetra asayar tongtibang karbo IPL tetenzüklen asaya ishika nungbo shilem magitetsü.

T20 leagues anaprongla nung asayaba tongtibang asayatem rongnung all-rounder Kieron Pollard, Chris Gayle all-rounder Dwayne Bravo, Shimron Hetmyer, Jason Holder, Nicholas Pooran, Fabien Allen, Keemo Paul, Sunil Narine nung densema lir aser iba den Trinidad and Tobago coach Brendon McCullum-a densema, lir shiba Kolkata Knight Riders coach lir.

CPL season tekububa nung alima ajunga nungi nüngtugu asayatem shilem agitsü asoshi renemdar.

IPL tanaben tenzüksü asayatsü atema Honibarnü BCCI indang SGM senden nung temelaba agütsüogo. IPL bio-bubble nung COVID-19 tashidak keta alir potetba sülen league ya athitsüsa aküm.



Dubai nung asayaba ASBC Asian Boxing Championships 2021 tetsür 75 kg category nung India tsür Pooja Rani-i gold medal nguogo. Kasa mapang nung tetsür 51kg category nung Mary Kom-ia silver medal nguogo. Noksa nung asayar anaprongla takok anguba sülen tangokba angur.

BILEMDANGANG

"Ajem ajema aliba ajanga tensa tajungba mekümdaksür."